

WAAGECLIQUE RHYWÄLLE

WWW.WAAGECLIQUERHYWÄLLE.CH



Fasnacht 2010



BASEL 1991

Sujet:

Ali Ben Merz und die wieschte Raiber E Märli uss Zwaidausig und nonere Nacht

Dr Ali Ben Merz, e muetigs Männli
und mächtig wiene Bonsai-Dännli,
gnesst si Joohr als Bundesbresidänt,
doch sy Amtszyt goht bald z Änd.
Gschwynd will är no zaige was är ka
und legt sich mit de wieschte Raiber a.
Denn kai Mensch wurd sunscht dra dängge,
ihm die neetig Ehr und Achtig z schängge.

Dä Raiberboss hett, me weiss es no,
zwei Schwyzer als sini Gaissle gno.
Als Stroof will i d Schwyz, „die sin nit gscheit
si hän dr Raibersohn in d Kischte gheit“.
Numme will dä em Personal Dätsch hett gä,
hett är miesse Wohnsitz in dr Kischte näh.
Das losst dr Raiberboss nit uff sich lo sitze,
sithär mien d Gaissle in dr Wieschti schwitze.

Dr Ali Ben Merz dänggt, - als Appizäller
bini doch im dängge schnäller,
drum hol ich dä Raiberboss
zaggig ab sim hoche Ross.

Im Oriänt akoo, hett die Mission afo laufe,
dr Ali Ben Merz maint: „dä Boss duen i kaufe“.
Doch dr Raiberhauptmaa isch zimmlig stur,
schiggt in d Verhandlige si zwait Garnitur.
Gänd mir ändlig unseri Schwyzer mit,
do lache d Raiber, so schnäll gohts nit.
Du muesch unserem Raiberboss huldige,
und di fir d Schwyz dausig Mool entschuldige.
Dr Ali Ben Merz strahlt, jä jo das mach i,
ich setz mi ganze Verstand fir die Sach y.
Uffem Haimfluug sind Gaissle aber nit derbi,
numme kai Panik, die kemme denn gly.

So isch Daag um Daag vergange,
die Zwai sinn als no in dr Wieschti gfange.
Dr Bundesroot hett offiziell verlutte loh,
in Sache Oriänt muess jetzt ebbis go.
Im Von Wattewyl-Huus sin si in Klausur,
dr Merz voraa, duuch wie dr Schuuflebuur:

Wie kennt me die zwai Gaissle au befreie?
Do foht d Micheline uff aimool afo schreie,
ich gang go verhandle, ich due nit versaage,
denn kann i au wieder mi Kopfduech draage.
Dr Ueli findet, jetzt muess ebbis gscheh,
mir ziehn geege d Raiber mit dr beschte Armee.
D Frau Widmer-Strumpf sait: „ich blib dehai“,
bi im Bundesroot none bitz wagglig uff de Bai.
Em Kuschundpäng isch dä Raiberboss glyych,
s git nummen ai Keenig und dä bin ich.
En Oriäntraisli isch fir dr Moritz kai Waahn,
är blibt do und ereffnet en Autibahn.
S Justizdoris will die Raibergschicht dämpfe,
und dä Raiberboss wiene Hooligan bekämpfe.

So weiss unsere liebe Bundesroot
au in däre Sach nit wies wyter goht.
Dr Ali Ben Merz findets nimm toll,
är hett d Nase und au d Hose voll.
Dä Raiber macht ihm numme Stress,
si näggschti Heldetat haisst UBS.

Fir die zwai Gaissle isch die Gschicht nit z Änd
si gnesse als no d Sunneuntergäng im Oriänt.

Gang als Rhywälle-VIP no an d Ladäärne- und Waage-Usstellig!

**Dää Zeedel het is wie allewyyle d Druggerei Bürgin in Birsfælde druggt.
Häärzlige Dangg.**